

四庫全書

集部

欽定四庫全書

張燕公集卷十一

唐 張說 撰

頌

聖德頌

太古厥初遺文闕矣書祖二典聿陳五教唐虞之訓歷
代宗焉孰同理而不休奚同亂而克遄皇唐之典也道
積四聖時將百年澤浸生人自根流葉孝和晏駕嗣子

幼冲凶臣嬖女微弱王室人甚崩角之危朝深綴旒之
歎賴天獎忠勇大戮鯨鯢尊文廟而安神清帝宮而待
聖少主奉天命以至禪皇上拒天命以固違羣公卿士
胥進曰陛下孝弟之至厯數在躬處儲闡有讓元子之
德居藩邸有辭太弟之高六合欣戴三靈允協為天下
君其誰與讓皇帝義不得已曰吁所憂之長也乃被帝
服陟元后延羣臣見兆人是日也景雲至茲歲也戎狄
來其尤祥極瑞雜沓異類蓋翫狎而不記矣上方謹庶

務覽衆則履乾乾懷翼翼遊道德之靈圃從鸞鷟之珍
羣視天下之所不見聽天下之所不聞帝典皇綱於斯
備矣宜定效報之禮革封禪之則答神貺揚立德不然
者則二宗無類帝之壇五岳無省方之館矣若夫湯頌
傳於考父文什著於周公臣下之志不可闕也敢作頌
曰

天祚聖唐啓我明主大哉皇帝與天同矩天乎蓋之地
乎載之陽和化育懷生賴之孝乎惟孝告成乎天靈壇

神岳思皇燬焉皇哉皇哉胡可舍旃大君受命景雲來
翔流天汎日爛漫成章稽諸瑞典昔祚軒皇而今表聖
土德以昌西戎遠國畏君之靈古稱即叙今乃來庭帝
女是降其從如星天人偃革以迄太寧吐胡狙獷狃於
征伐帝初歷試護彼窮髮懷哉好音稽顙天闕遐哉大
同天子之功

上黨舊宮述聖頌

維開元十有一祀正月皇帝展儀于河東挾右太行留

宴上黨整兵耀武入于太原設都建頌以崇王業南轅
汾睢祈穀后土天清日潤神歆如答三月庚午飲至長
安六軍解嚴四方和會邇觀法象遐詠德澤大虞巡之
典修美漢祠之禮舉人心翕而一變神物效而無方於
是邠王臣守禮寧王臣憲申王臣範薛王臣業獻書於
內開府儀同三司臣憬尚書臣駿臣象先臣頤御史大
夫臣淮抗疏於外僉曰陛下受天歷數稽聖典謀道貫
三靈仁育萬類掃陰沴而覩日開闢之功也尊文考而

御天帝王之孝也天以陛下為子人奉陛下為君萬殊之福祈應畢臻三代之風頌聲咸作今潞人懷代卹誅泗亭採聖瑞建玄石將表潛龍之館勒啟聖之圖勤亦至矣陛下推而不報其何以下塞衆望上對神休哉臣聞天之所啟人之欣戴必憑睿聖玄懿之德元命真符之紀功業見乎變德施加乎時德厚者施溥功玄者應速或階晦以彰或由難而昌蓋生其德之謂天授其時之謂命天有成命其可沒乎陛下昔居是州也紫雲在

天神光照室白鹿來擾黃龍上昇隴出仙洞而神魚躍
山開禪穴而靈鐘韻謠言合識巨迹引途嘉李傍連神
著自起當此時也金石預變獄頌先歸政殷六府人重
五教陶無寐器漁有讓泉神而化之人不知力昔龍負
圖而大舜登狼銜鉤而后殷昌元珪錫於夏禹赤伏歸
於漢光猶言先運吐符希代稱寶未有窮祥極瑞倣儻
瓌異如今之至者矣若立貺集而不彰則神心不悅鴻
業成而不贊則祝告無聞是掩天休而蓋聖德也臣子

之罪將何解焉願聽潞人以揚丕烈帝曰往者中宗違
代國步微艱天祚我唐大命集于睿宗大聖真皇帝朕
畏天將命不敢怠遑其乾符坤珍皆先聖之餘福朕何
力之有焉然重違昆弟公卿之請抑以敬從無為虛美
重朕不德也羣臣遊聖蕩莫能名約乎舊史敢頌成績
曰

帝德廣運乃聖乃神天祚聖兮唐雖舊邦其命惟新再
受命兮帝初正人降居上黨天下往兮黃龍晝見攀天

而上九五象兮帝適于野紘雲之下求必在今帝寢于
堂變龍有光觀者駭兮天跡星謠木連著立總神異兮
靈鍾化穴縞鹿赤魚可詭異兮上天無聲託類附形覺
悟人兮聖皇齋栗在得戒失照事神兮皤皤潞老樂我
王道愛舊宮兮赫赫頌功與天比崇攄無窮兮

答制

往者中宗違代國步微艱天祚我唐大命集于睿宗大
聖真皇帝朕以寡昧嗣守丕業虔奉遺訓不敢怠荒至

欽定四庫全書

卷十一

天地休徵人神靈貺皆先帝聖德之餘慶朕何力之有
焉至若登太行留上黨頌功業建都畿休兵太原為農
睢上並國之典禮朕奉而行之何足稱者而羣臣固請
紀頌衆心難違卿藻思菁華揚過其實自視虛缺為媿
尤多

皇帝在潞州祥瑞頌十九首奉勅撰

日抱戴

皇帝初臨潞州景龍元年四月二十有七日其日日抱

戴頌曰

日告帝符王起乘土重光五色四方之主或抱或戴氣
華暉嫵大明經天豈忘忠輔

月重輪

皇帝臨潞州景龍元年七月十有四日夜月重輪頌曰
維帝潛德受天眷命月之重輪示我金鏡璧彩內澈環
規外映君心用明神道協慶

赤龍

皇帝臨潞州景龍二年四月二十五日廳事據按假寐
百姓白鶴觀道士宋大辨等三十餘人同見赤龍在案
頌曰

聖寐無體神融氣渙蜿蜒然赤龍垂首據案昔有王媪預
覩興漢今此潞人亦兆靈觀

逐鹿

皇帝景龍二年二月二十有八日巡屬縣至潞河有鹿
奔走渡河水深三丈帝馳鞭逐鹿水不及馬羈應時獲

鹿司戶叅軍崔弼隨帝而涉纔入數步馬溺焉頌曰
王者之政必有天佐遂鹿深水乘躍而過不失其馳舍
矢如破後騎沒溺乃驗靈跡

嘉禾

皇帝臨潞州景龍二年八月二十有五曰長子縣界內
有嘉禾合穗頌曰

靈氣滋液嘉禾族生或分九穗有合雙莖昔效唐叔歸
功太平今於歷試抽此德萌

黃龍

皇帝臨潞州景龍二年九月五日黃龍見于州城東五里伏牛山南岡遲留久之觀者如堵頌曰

黃龍二精五方之長在田而見文明厥象軒圖瑞來夏
賈妖往惟德可應恃神難調

羊頭山北童謠

皇帝臨潞州景龍二年九月已後嘗有童謠云羊頭山
北作朝堂其州南六十里有羊頭山頌曰

熒惑降精是為天使會合
韶龔謳謠街市通賢妙識採
斷來事山北朝堂此明天位

仙洞

皇帝臨潞州襄垣縣北有仙洞忽然自開十數里仙乳
靈液凝膏注玉頌曰

憑乘山穴應吳建號襄垣洞開神亦我報玉膏滴瀝石
巷幽與天將祐之陰靈啟道

大王山壘

上黨記禹治水而登此山因名焉魏書云望氣者言其
山有天子氣故太武壘石為三欲以厭之頌曰

昔望茲山當出天子太武心忌壓以軍壘地氣雖廢河
清有俟三百餘年聖人方起

疑山鑿斷

上黨記後魏太和末孝文帝自代幸洛見此山有伏龍
疑而不進遂斷山東麓以厭之其斷處猶存因名疑山
頌曰

王命必有厭勝多無不徵緣錯虛役丹徒舊山伏氣今
聖靈符魏雖穿鑿能違天乎

赤鯉

皇帝景龍三年三月巡屬縣至襄垣南漳水上有赤鯉
魚騰躍頌曰

龍或魚服鯉同國姓躍泉將飛告我天命鱗昭武德翼
贊興慶昔去隨仙今我迓聖

黃龍再見

皇帝臨潞州景龍三年六月十五日黃龍再見于伏牛

山頌曰

蜿蜿黃龍既見將躍氣動雲繞精流電爍文明剛健嫵媚纖弱萬物覩焉聖人其作

紫雲

皇帝臨潞州景龍三年九月九日與羣官壺口山界坐其時東北有紫雲翩翩而來光彩照日明日上黨縣丞王敬賓等白刺史劉懷一并啟皇帝請上狀奉教不許

頌曰

天臨壺口露座山眉紫雲來覆如蓋如帷畢景不滅含
風自持一人有慶兆民賴之

李樹

皇帝臨潞州延唐寺有李樹連理皇帝親自驗見之御
書額焉頌曰

李興帝族寺勝延唐異枝同幹雙名合祥花轉瑤萼子
綴珠光本支百代永永蕃昌

神著

皇帝臨潞州景龍三年九月十有五日召百姓韓擬禮著筮卦未成而一著翹立擬禮曰此天人之瑞洎帝踐阼授擬禮遊擊將軍長上折衝頌曰

纖纖靈著下有伏龜天生神物以決狐疑一著特起自天立之無卦之卦告帝之期

金橋

金橋在潞南二里常有童謠云聖人執節度金橋皇帝

景龍三年十月二十有五由此橋朝京師頌曰
出郡二里橫路金橋聖人南度駟馬西朝運及誅呂時
當換堯却尋後事一合童謡

紫氣

皇帝臨潞州景龍三年十月二十有五還京後州內
所居寢堂有紫氣七日不散

王往京國傾城戀悅紫氣浮宮七日不散斐亶牕戶輪
囷臺觀都人係心瞻仰雲漢

大人跡

皇帝從臨潞州還京後其宅內及州街並有大人跡長二尺五寸自東而西布武相繼頌曰

百神從王一舉西適衆觀空解聯步雲跡躡似郊媒痕同雷澤曠古奇事存乎帝籍

神人傳慶

皇帝唐隆元年六月二十日夜除妖孽後其明日州佐吏索崇嗣於州南門外聞空中有人云臨淄王誅韋氏

相王得天下其崇嗣告長史裴思裴思以妖惑罪之禁錮累日逢其月二十一日赦到獲免案牘猶存

天帝下席承韋干命王赫斯興撥亂反正擊凶尊主一麾大定神人相歡聆響傳慶

開元正歷握乾符頌

客有嘲臣曰聖主正新歷握乾符百寮賡歌以美時六合鼓舞以頌德先生獨宴默書閣舍翰詞林奚其為僅儼也臣應之曰斗水不能評巨壑之量隙光未足議大

明之體何者見禰而守隘也握乾符者不謂執天命與
執天命者非夫廣德休歷交相表裏況命者夫子之罕
言也焉可偏贊而總握符之盛哉如作者略大本舉小
節不亦仲尼之門所聽瑩也是以洞思乾慮久難其述
客無異焉客曰請終餘論粵若我大唐慶始白雲道昇
紫氣屬漢東失馭淮南不返高祖舉晉陽之甲戡定關
西太宗因侯后之師削平天下高宗收圖海外檢玉封
中九域黎人重代飲澤雖鳴驚改號神龍中興周鼎歸

唐玄圭祀夏中宗違代嬖孽窺國於是乎聖上起藩邸
入鈎陳一麾水心羣凶泥首崇復大聖越踐少陽受禪
當寧而光大前烈垂統拜壁而慎寧後嗣四海有覆盂
之安百代無委裘之隙是之謂聖人握符之大寶也四
星入輔五將出禦倚禮樂為國計仗仁義為軍勢英賢
集殿而文教成千戚舞階而武功振敬讓光于九族孝
慈行於萬宇磧嶂西南渤瀚東北織皮火毳暘炎山污
熱海向風來王黑貂駿浮天溟絕冰漠連歲獻款鳥

獸無猜人之意草木無不達之氣升中于天比天同貴
是之謂聖人握符之大政也歷試上黨黃龍飛天入清
中禁白虹指日瘞汾雕寶鼎見柴岱宗卿雲蔚非應事而
呈瑞者雖多狎而不紀矣是之謂聖人握符之大祥也
以數推氣以氣定朔以星殷時以閏成歲考星閏而革
疏度置歲差而辨誤日立大衍之紀參大渾之晷合鍾
律之聲極鬼神之情是之謂聖人握符之大歷也若夫
仁聖根於內菁華發於外祥兆秘於前謠識灼於後自

然之理也彼洛下閎者漢太初時一巧歷耳云後八百
歲當差一日有聖人正之斯人也抑將露才揚術預證
來聖有耆舊之傳記無史策之明文然至隋之開皇及
麟德聖歷三家創法一引為徵約之年代則鄰近稽之
圖籙則曖昧未有如新歷之昭昭者矣在昔唐虞之際
以斗精受命者七人得四均間氣而生者又二十八人
所謂三十五際者也禹以金德王故夏后之有天下也
生數四百年契以水德王故殷人之有天下也成數六

百年稷以木德王故周人之有天下也成數八百年伯益之命中天而堯族以火德乘之故漢室之有天下也生數再及二百年其間距王而興不能復大禹九州之跡及勝殘百年之命者皆五神之餘氣也咎繇降德皇唐復興土精應王厚德載物生數五百成數千年命歷有歸此其大較脩德增祚與天無窮轉筭之徒莫能究也緯以八元三百四歲為德運七百六十歲為代軌千五百二十歲為天地出符四千五百六十歲為七精返

初天人相應合若符節自堯典命羲和修重黎之舊理
顓頊之歷上元甲子千五百餘歲得孔聖而春秋之歷
序暨開元十二年甲子凡三千四十歲遇聖上而大衍
之歷興是時也土德入生數之元天命當出符之會信
矣伏惟聖上聰明文思道德之具也豁達大度皇帝之
體也藝總六經漢光之學也文通三變魏祖之才也緣
情定制五禮之本也洞音度曲六樂之宗也神於弧矢
黃軒之威也聖於翰墨蒼頡之妙也兄弟善友王季之

之心也子孫衆多周文之福也大寶以定天位大政以布廣德大祥以合靈符大厯以啟成命德位兼才臨照如此符命介福粲章如彼所謂廣德休厯交相表裏之效也善厯者必推來運以自神興王者不俟往言以表聖設徵夫洛下閎之語也其不有容成之事乎且如恃有命比於日孰是夏王之福也賴卜年哀其德豈謂周公之訓也故曰王者執天命在於俟天符致天符在於順天德布天德在於保天位四者備矣然後陳其盛德

告於神明捨此道也胡可語正天歷握乾符哉諛臣惜
學謝生立造樂虞典之歌舜美周詩之美文敢不敦信
辭薦清樂獻上客之誚託衆篇之後云爾

維皇六葉於赫啓聖步玉斗握金鏡地維續天柱正山
川授方雷雨施令清廟九祐堯門百慶郊稷尊祖擇昌
定命德自我流藝從我修龜易八卦龍書九疇文含玉
律字吐金鈎鳴絲鶴舞調箭猿愁集賢榜殿花萼名樓
神用外表事行先兆萬目朝徹千心暗曉卿雲爛漫黃

龍窈窕遊姑射神人宵登太山天下小飛祥定瑞均靈
蹠類鞮譯窮天琛維盡地爍此金戟鑄為農器匪直也
然探玄索秘軸止輪運辰居星轉得一神凝吹萬情辨
發斂潛合晦明幽闡階莫朝開宮槐夜卷正我長歷同
符大衍天地清焉日月貞焉四時行焉萬物生焉窮神
知化美功成焉金版玉牒遠頌聲焉

起義堂頌

堯以天下禪舜舜以天下禪禹禹將宅百揆總萬國一

讓於稷卨再讓于臯繇稷卨先舉彼商與周以之更盛
臯繇後天我國家于茲受命非舜以考天而疇咨審靈
命之陰騭非禹以享天而德讓知歷數之有歸及乎玄
元間出光大前慶垂道德而統運依清虛而立法天祚
我李厥惟舊哉并州起義堂者皇天造帝之初高祖誓
衆之地也隋氏失御國亂無家小道自賢大才胥忌惟
宮室陂池之好惟沈湎暴慢是保上帝不歆黎人咸戚
六軍踰海而東敗萬乘過江而南覆豺狼入邑獬獍爭

欽定四庫全書

卷十一

十七

人黔首嚮然方將無訴我高祖感之乃龍躍晉水鳳翔
太原百神前驅萬姓來奔開咸陽入天門用湯武之兵
靜新室之亂遵唐虞之典承太王之基率百官受終于
文祖輯五玉班瑞于諸侯類圓裡方之禮備封功爵德
之議允約法惟簡代虐以寬于惠困窮懷柔蠻貊金石
一變日月重華近古以來未有革命易姓若此之盛者
也非天私我有唐惟天祐于積德非唐求于人庶惟人
懷于累仁當此之時太宗內啟聖謀外行專斷躬擐甲

胄跋履山川駕英雄而為興主一區域而定大業周詩
曰昊天有成命二后受之信今之謂也若夫修德以降
命奉命以造邦源濬者流長根深者葉茂天人報應豈
相遠哉觀周之興始于后稷公劉承以大王王季皆勤
儉忠厚克廣前烈至于文王成之武王啓之康王安之
故卜世三十卜年八百天所命也我唐之興也始于皐
繇玄元承以景皇元帝皆立言邁德垂裕後昆至于高
祖受之太宗有之高宗守之中宗復舊業睿宗新景命

比之周室我何謝焉且如陳德明刑庶其躬稼之績立
宗道要小其避狄之仁化流率土狹其江漢之域義寧
大朝羞其牧野之戰故武德中太行出大聲曰唐興理
萬年蓋天之所命年代未可涯也仲尼曰惟天為大惟
堯則之又曰韶盡美矣又盡善也非至德其孰能如此
其大者乎於戲先后捨元子而立予主鬯煩大位而付
予天下自高祖創業百有六戰欽承丕緒十有四載東
西南北無思不服山川鬼神亦莫不寧實惟藝祖儲福

之所致豈予幼孫菲德之能及方將運心于玄妙之境
勵志于造化之爐發令為祥符施惠為霖雨任賢為兩
曜仗能為四時俾天之下有形者遂全懷生者自足樹
鋪野繭田種嘉穀斲雕為樸捐珠棄玉追大庭而齊風
夢華胥而同俗非曰能爾願憑宗祏而效焉癸亥之歲
獻春正月濟河橫汾省方展義存問黎老緬慕本邦城
郭歸然桑梓如舊覽風物之憂思尋王業之艱難惟高
祖若天地之開闢化成萬類惟太宗若日月之照臨光

于四表舉晉陽之甲除君側之盜由唐侯之封升天子
之號肇基發迹實在于茲仙駕無所或顧懷于舊土靈
魄無方倘來歸于土堂郡縣之所宜嚴奉前人有言曰
禮不忘本樂保其德如姬詠周原而劉歌沛邑思我烈
祖如聞歎息之音嗟爾後人無忘成功之頌頌曰

皇矣上帝臨下有赫降監四方求人之瘼吁彼隋煬其
政不獲眷我高祖此惟其宅天輔臯陶明刑弼教道尊
老氏同立體妙仁表四乳明燭獨照隨父託心史良辨

貌高祖誕靈神光夜耀天妹作合日兄夢紹祚生文帝
膺運會昌首唱高祖鸞飛晉陽萬夫一心元戎啟行火
旗炎炎雲烏洋洋五星迓帝萬國謳唐天網恢疎王師
節制威惟連戮老生摧斃山祗引軍河龍渡帝渭倉散
積離宮弛閉闕輔來蘇遠方咸惠長安宮室上法太微
隋遷寶鼎唐在璿璣仗入雙闕詔出九圍三靈協載百
祿同歸帝謂太宗表正封略濤蕩颺掃霆馳電爍斂不
摧鋒弩無再曠西平汧隴東取河洛果密德充頭懸面

縛北走獫狁南達蠻荆遼碣作人梁岐底平風動神行
海隅蒼生莫不來庭於昭義堂誓衆資始天命所起于
胥頌美維予小子夙夜敬止於戲皇王緒思不忘

大唐祀封禪頌

皇唐六葉開元神武皇帝再受命致太平乃封岱宗禪
社首鑿石紀號天文煥發儒臣志美立碣祠壇曰厥初
生人俶有君臣其道茫昧其風朴畧因時而歛起與運
而紛落泯泯沒沒無聞焉爾後代聖人取法象立名位

衣裳以等之甲兵以恒之於是禮樂出而書記存焉反
其源致敬乎天地報其本致美乎鬼神則封禪者帝王
受天命告成功之為也閱曩聖之與訓攷列辟之通術
疇若天而不成曷肯道而靡失由此推之封禪之義有
三帝王之略有七七者何傳不云道德仁義禮智信乎
順之稱聖哲逆之號狂悖三者一位當五行圖籙之序
二時會四海昇平之運三德具欽明文思之美是謂與
天合符名不死矣有一不足而云封禪人且未許其如

天何言舊史者君莫道於陶唐虞舜臣莫德於臯陶稷
禹三臣降德皆有天下仲尼叙帝王之書繫魯秦之誓
明魯祀周公用王禮秦承伯益接周統孔聖微旨不其
效歟然秦定天下之功高享天祿之日淺天而未忘庭
堅之德也故大命復集于皇家天之贊唐不惟舊矣其
興之也玄靈啟迪黃祗顧懷應歸運以義舉撫來蘇以
利見獲也無放夏之慙武也無伐殷之戰高祖創業四
宗重光德有格天漏泉蒸雲濡露菌蠢滋育氤氲煦

若天地之覆載日月之照臨溥有形而歸景罄無外而宅心百有八年于茲矣皇帝攘內難而啓新命戴睿宗而繼舊服宇宙更闢朝廷始位蓋羲軒氏之造皇圖也九族敦序百姓昭明萬邦咸和黎人於變立土圭以步歷革銅渾以正天蓋唐虞氏之張帝道也天地四時六官著禮井田三壤五圻成賦廣九廟以尊祖定六律以和神蓋三代之設王制也武緯之文經之聖謩之神化之然猶戰戰兢兢日慎一日納規誨以進德遂忠良以

代工講習乎無為之書討論乎集賢之殿寵勇爵貴經
門翼乎鵷鸞之列在庭毅乎貔貅之師居鄙人和傍感
神寶杳至乾符坤珍千品萬類超圖溢謀未始聞記我
后以人瑞為心初不以物瑞為異王公卿士儼然進曰
休哉陛下孝至于天政合乎道前年祈后土人獲大穰
間歲祀圜丘日不奄朔祥感以祈聖因事以觀天天人
交合其則不遠意者喬丘拭路望華翠之來上帝儲恩
俟蒼璧之禮久矣焉可專讓而廢舊勛羣臣固言勤帝

知罪至于再至于三帝乃揖之曰欽崇天道俯率嘉話
恐德不稱敢憚于勤其撰巡狩之儀求封禪之故既而
禮官不成而備軍政不謀而輯天老練日雨師洒道六
甲按隊八陣警蹕孟冬仲旬乘輿乃出千旗雲引萬戟
林行霍濩燐爛飛焰揚精原野為之震動草木為之風
生歷郡縣省謠俗問百年舉百祀興墜典葺闕政攸徂
之人室家相慶萬方縱觀千里如堵城邑連歡丘陵聚
舞其中垂白之老樂過以泣不圖萬里之魂復見乾封

之事禋雲往舜日還神華靈鬱爛漫乎穹壤之間是月
來至于岱祇祓齋宮滌濯靜室凝神立覽將歟太一議
夫太山者聖帝受天官之宮天孫總神靈之府自昔立
國莫知萬數克升中而建號惟七十而有五我高宗六
之而今七矣非夫尊位盛時明德曠代遼闊難併之甚
哉先時將臻夫大封也累封疆於高岡築泰壇於陽趾
夫其天壇三襲辰陞十二咸秩衆靈列座有次崇牙樹
羽管磬鏞鼓宮懸於重壇之內千戚釵戈鉤戟戢戰周

位於四門之外伐國重器傳代絕瑞旅之於中庭玉輦
金轂翠冒黃屋夾之於端路庶官百僚羗夷蠻貊褒成
之後讓王之客序立於禮神之場髦頭弩牙鐵馬金鏃
介冑如雪旗幟如火遠匝於清禁之野於是乎以天正
上元法駕徐進屯千乘於平路留羣臣於谷口皇帝御
六龍陟萬仞獨與一二元老執事之人出天門臨日觀
次沆瀣宿曉岩赤霄可接白雲在下庚寅祀高祖於上
封以配上帝衆官於下位以享衆神皇帝冕裘登壇奠

獻俯僂叶金奏侑羽舞撞黃鍾歌大呂開闔闔與天語
清將信公奉斗布度懋建皇極勤恤蒼生招嘏乎未兆
禳災乎未萌上下傳節而禮成樂遍福壽同歸而帝賜
神策乃檢玉牒於中頂揚紫燎於高天庶忠誠之上達
若憑炤而駕烟日轡方旋神心餘眷五色雲起拂馬以
隨人萬歲山呼從天而至地越翌日尊睿宗侑地祇而
禮社首遂張大樂觀東后國風惟舊無黜幽削爵之誅
王澤惟新有肯災大賚之慶不決日至化洽於人心不

崇朝景福遍於天下然後藏金匱於柘室迴玉鸞於上都煌煌乎真聖朝之能事而高代之盛節者也于斯之時華戎殊俗異音同嘆曰兵合多雨山峻多雲豈有大舉百萬之師剋期千里之外及行事之日則天無黠翳地無纖塵嚴冬變為韶景寒谷鬱為和氣非至德其孰能動天如此其順者乎昔人云自西自東自南自北無思不服今信知聖人作而萬物覩其心服之之謂矣或曰祭泰折主先后非禮歟曰是禮也非宜也王者父事

天母事地侑神崇孝無嫌可也且夫柴瘞外事帝王主
之烝嘗內事后妃助之是開元正人倫革弊禮起百王
之法也故令千載睹末光聆絕韻咀甘實漱芳潤爍立
妙之至精流不已之淑聲臣悅作頌告于神明四皇墳
而六帝典雖吉甫亦莫能名徒採彼輿人之詩曰大矣
哉惟天為大惟皇則之率我萬國受天之祺子孫百代
人神共保綏之云爾而已矣

大唐開元十三年隴右監牧頌德碑奉勅撰

周禮校人掌王馬之政天子十二閑馬六種閑為一廐
馬二百一十六應乾之策也六廐成校五良一駑是之
謂小備校有左右閑成十二合月之道也駑馬三良馬
之數凡三千四百五十六是謂之大備秦并一海內六
萬騎之國馬盡歸之帝家則周制陋矣漢孝武富文景
儉局乏積雄衛霍張皇之勢勒兵塞上廐馬有四十萬
匹及東漢魏晉國馬陵夷不可復逮武帝時矣後魏胡
馬入洛蹴蹋千里軍陣之容雖壯和鸞之儀亦闕大唐

接周隋亂離之後承天下征戰之弊鳩括殘燼僅得壯三千從赤岸澤徙之隴右始命太僕張萬歲葺其政焉而奕世載德纂修其緒肇自貞觀成于麟德四十年間馬至七十萬匹置八使以董之設四十八監以掌之跨隴西金城平涼天水四郡之地幅員千里猶為隘狹更析八監布於河曲豐曠之野乃能容之于斯之時天下以一縑易一馬秦漢之盛未始聞也張氏中廢馬官亂職或戎狄外攻或師圍內寇垂拱之後二十餘年潛

耗太半所存蓋寡開元神武皇帝登大寶受靈符水瑞
感而河龍出星精應而天駟下二年春帝乃簡心腑善
畜之將福祐宜生之長俾領內外閑廐使焉即開府霍
公其人也公名毛仲姓王氏開元佐命之元勳東國亡
王之後裔四伯輔禹與治水之謨四七興漢在經星之
列清明虛受察含氷鑑籌謀先覺慮出著龜竭無私之
忠而善歸天造輸不懈之力而元同日用故騰躍風雲
攀附日月策功第一承恩莫二庭羅魏絳之鐘鼓第賞

京邑之山林文馬蕃錫於晉侯御衣亟分於韓信庶姜如玉則降榮彤管衆子垂髻則抱拜朱第聖人之見也必迫爾為之四顧而滿志聖人之不見也乃恤然若無與樂其天下仲尼所謂是必才全而德不形者也夫處其身則立無跂正也視無還端也聽無聳誠也言無遠慎也國有憂未嘗不戚國有慶未嘗不怡其御下則明利害之鄉阜財求之務使之趨善而避惡懷德而畏威身不離於闕庭令遠行於垌牧亦有不學而暗合於古

未更而懸辨其事然其從政必問於遺訓而資於故實
者也若夫春祭馬祖夏祭先牧秋祭馬社冬祭馬步敬
其本也日中而入焚原燎牧除蓐豐廐時其事也潔泉
美薦庠涼棧濕翹足而陸交頸相靡宣其性也攻駒教
駢講馭臧僕刻之剔之羈之策之就其才也不反其性
故親人樂藝節樂如舞之心自生不窮其才故闔扼驚
曼竊轡詭銜之態不作爾乃舉其神異則望駒踰驤裊
乘黃茲白來儀外廐呈伎內櫪朝刷閭風夕洗天泉聖

皇一馭長壽萬年別其種類則有妍蹄繁鬣小領遠志
曰龍曰騄曰戎曰驥差其毛物則有蒼白驪黃騂紫驕
皇騄駉騊駼駟駘駘駘駘駘駘駘駘駘駘駘駘駘駘駘
狼尾魚目宗廟齊豪戎事齊力田獵齊足罔不畢有元
年牧馬二十四萬匹十三年乃四十三萬匹初有牛三
萬五千頭是年亦五萬頭初有羊十一萬二千口是年
亦二十八萬六千口皇帝東巡狩封岱嶽輦輅既陳羽
衛咸備大駕百里烟塵一色其外又有閑人萬夫散馬

千隊骨必殊貌毛不雜羣行如動地止若雲屯百蠻震
聳四方抃躍威懷紜紛壯觀揮霍迴衡飲至朝廷宴樂
上顧謂太僕少卿兼秦州都督監牧都副使張景順曰
吾馬幾何其蕃育卿之力也對曰帝之福也仲之令也
臣何力之有因具上其狀帝用嘉焉霍公口無伐辭貌
無德色朝髦庠齒歆以多之於是明威將軍行右衛郎
將南使梁守忠忠武將軍行左羽林中郎西使馮嘉泰
右千年長史吐使張知古左驍衛中郎將兼鹽州刺史

鹽州監牧使張景遵隴州別駕循武縣男東宮監牧韋
衡都使判官果毅齊琛總監韋績及五使長戶三萬一
千人僉曰自開府庇我十三年矣畜有媿息人無乏匱
克厭帝心莫匪嘉績且如停西南兩使六頓人夫藁穀
計八十萬工圍石以息人約費其政一也納長戶隱田
稅三萬五千石以儉私肥公其政二也減太僕長支乳
酪馬錢九千三百貫以窒隙止散其政三也供軍筋膠
十萬七千斤以收絹繕工其政四也蒔苡麥苜蓿一千

九百頃以芟蓄御冬其政五也使監官料舊給庫物新
奏置本收分其利不喪正錢二萬五千貫以實府宜官
其政六也賈死畜貯絹八萬往嚴道市焚僮千口以出
滯足人其政七也五侯長戶數盈三萬墾田給食糧不
外資以勸農却輓其政八也敢問羣牧之事孰能加於
此乎然則稱伐計功前典所貴上以美聖主擇才之得
人下以贊忠臣受任之盡節未以道官屬承風之成事
竟以示後代昭前之令聞是四烈者不可廢也既而大

君有命舊史書功吟咏環竒篆刻金石秦汧渺渺尚想
非子之風魯野區區猶傳史克之頌試從此而觀彼夫
何足以言哉頌曰

皇天考牧兮聖之君四十三萬兮馬為羣塹汧渭兮垣
隴坂飛黃阜兮昆蹄苑山崆峒兮水鳴咽泉噴玉兮草
汗血聚如花兮散如雲性既馴兮才亦絕維國家之大
事駕時龍兮祭天地和鑾發矣文物備維皇帝之七德
總戎馬兮威萬國彩髦翻兮金介冑有霍公之掌政擇

張氏之舊令天王駕兮仗黃麾太僕驂兮展輅儀舞月
駟兮蹀雲螭神倜儻兮態權奇騏驥溢野兮牛羊日多
子孫榮位兮思寵如何頌皇靈兮篆石鼓萬斯年兮羣
王府

廣州都督嶺南按察五府經略使宋公遺愛碑
頌

維唐御天下九十有八載蒼生賁乎海隅立澤漫乎荒
外天子念窮鄉之僻陋徼道之修阻吏或不率不馴人

或不康不若乃命舊相廣平公宋璟鎮茲裔壤式是南
州篤五管之政教總三軍之旗鼓幅員萬里馴致九譯
詔書下日靡然順風曷由臻斯威名之先路也公曩時
執白簡登瑣闥推誠蹇諤不私形骸忤英主之龍鱗踰
奸臣之虎尾挫二張之銳則聲恒竄域折三思之角則
氣蓋風雷由是極有四星維帝之輔地有五岳維天之
柱其入宰也君之股肱其出守也人之父母至於此邦
之長人也飲食有節衣服有常清心而庶務簡正色而

羣下一瑟兮憫兮赫兮喧兮固以不怒而威不言而信
雖有文身鑿齒被髮儋耳衣卉麵木巢山館水種落異
俗而化齊言語不通而心喻矣其率人板築教人陶瓦
室皆塗墍晝遊則華風可觀家撤茅茨夜作則災火不
發棟宇之利也自今始祖國之舶車海琛雲萃物無二
價路有遺金殊裔胥易其廼途遠人咸內我邊郡交易
之坦也有如此故能言之士舉為美談蓋微子去殷以
後王者襄公伐楚將得諸侯尚書東漢之雅望黃門址

齊之令德宋氏世名公其濟美詩所謂無念爾祖聿修厥德廣平有焉若夫往者屈也來者伸也往來相召而哀樂繼之鴻飛遵渚於汝信處龍章袞衣以我公歸鬱陶乎人思嗟嘆之不足廣府司馬譚瓌耆耄老某乙等相與刻石傳徽斯文予春秋之徒也豈將苟其辭哉雅敬宋公王臣之重次嘉譚子贊德之義遙感耆舊去思之勤越裳變風知周公之才之美吉甫作頌見申伯于藩于宣觀政將來惡可廢也頌曰

降王宰兮遠國靈歌北戶兮舞南溟酌七德兮考六經
政畫一兮言不再草木育兮魚鼈寧變蓬屋兮改籬墻
魚鱗瓦兮鳥翼堂洞日華兮皎夜光火莫炖兮風莫颺
事有近兮惠無疆崑崙寶兮西海財幾萬里兮歲一來
舟如島兮貨為臺市無欺兮路無盜旅忘家兮扃夜開
越井岡兮石門道金鼓愁兮旌旆好來何暮兮去何早
爆牛牲兮菌雞卜神降福兮公壽考

龍門西龕蘇合宮等身觀世音菩薩像頌

我聞上古有聖人心入羣有身包大空普觀察一切音聲其名曰觀音菩薩日月有盡光明無際天地有終神通不滅禮其形像隨願而成功稱其名號應時而獲果龍門西龕等身像者此都人士思賢令蘇君之所造也天下之大都有五而河洛總其中皇居之赤縣有二而合宮是其一四隩輻湊萬商庀謬政頗財黥刑放寵祐所由然舊矣故強毅臨之則攫斂姦擾虺虐不辜以扶摸睚眦是稱辨吏寬厚處之則乾沒淫詭相詐莫禦以

息偃簡怠謂之風流其傷弊一也武功蘇君名頤字廷
碩隋右僕射邳國公之玄孫今吏部尚書懷遠公之元
子相門華列儒庭善訓雍容文雅當代知名通才博藝
於何不可御史天憲也抗執簡之雄郎官星象也高握
蘭之選帝車西幸皇眷東遙四方之極一臺歸妙蘇君
於是乎始為政於京邑籍田戶以衍賦徹考資畜以程
力任董通逃以業浮庾詰姦慝以豫筑釐制事典以示
好惡敦術學以興禮義省法罪獄吏無作威煦郵駟圉

人不敢產加以躬親足以勵勤謀始足以作則端莊足以易暴清儉足以息貪夫如是簡往而事行正身而人慕輕薄束修而歸厚流亡襁負而來復曾未朞月遷給事中既而人吏父老聚而謀曰咨休哉明府之惠人也春風暢之時雨露之心乎愛矣何以祝之朝廷豈不念下民之鬱陶乎奚其為奪我君而不省留也詩曰愷悌君子神所愛矣庶幾乎三珍依憑百祥臻降云爾乃購奇匠倣霸峯追琢鏡光鏡鑒電涎倚高壁臨懸闕蹈石

酌戴珉髮縹緲雲聳嬋娟玉立模宰官之形儀現輪王之相好諦視瞻仰將筦爾而微笑攝心傾聽疑僊然而有聲其左右則福地園林香城基址前佛後佛大身小身亘岑嶺而相望遍虛瑩而無數此身不動觀大地之衆生彼佛無來見河沙之世界爾其址對宮觀南馳荆越闕路豁開而中斷伊水逶迤而長注修途交會車馬川流帝城風俗是焉遊覽如鎮南之峴山似關西之灞岸暮春桃李上巳清明汎法地之淥波憑靜域之丹檻

揚袂陰景躡步震山花散四天香開八國以不居之歲
月閱無窮之人代知妙容之常在觀永劫之因緣盛德
相傳與此山而終始不其偉歟昔孔子化中都以攝魯
相卓茂理于密以致漢台夫樹善有基建功無小蘇君
春秋鼎盛德業日新方欲驤首天池整翮雲漢致大君
於堯舜紹層構於韋平是宰也故以五輅之推輪九域
之覆篲已重宣此義而說偈曰大哉立聖心如明鏡深
入禪定龍飛清淨觀我物性靈相珍飾精窮妙極千品

之側因空見色登我願力不競不絀不剛不柔敷政優
優百祿是道侑我蘇侯

欽定四庫全書

張燕公集卷十一

張燕公集卷十一

欽定四庫全書

張燕公集卷十二

唐 張說 撰

贊 銘 箴 記

蒲津橋贊

易曰利涉大川濟乎難也詩曰造舟為梁通乎險也域中有四瀆黃河是其長河上有三橋蒲津是其一隅秦稱塞臨晉名關關西之要衝河東之輻湊必由是也其

舊制橫絕百丈連艦十艘辦修竿以維之繫圍木以距之亦云固矣然每冬冰未合春沍初解流漸崢嶸塞川而下如礎如臼如堆如阜或擬或提或磨或切綆斷航破無歲不有雖殘渭南之竹仆隴坻之松敗輒更之罄不供費津吏成罪縣徒告勞以為常矣開元十有二載皇帝聞之曰嘻我其慮哉乃思索其極數祐于下通其變使人不倦相其宜授彼有司俾鐵代竹取堅易脆圖其始而可久紓其終而就逸受無疆惟休亦無疆惟恤

於是大匠歲事百工獻藝賦晉國之一鼓法周官之六
齊飛廉煽炭祝融理爐是鍊是烹亦錯亦鍛結而為連
鑠鎔而為伏牛偶立於兩岸襟束於中渾鑠以持航牛
以驚纜亦將厭水物莫浮梁又疏其舟間畫其鷁首必
使奔嘶不突積凌不隘新法既成永代作則原夫天意
有四旨焉濟人仁也利物義也順事禮也圖遠智也仁
以平心義以和氣禮以成政智以節財心平則應諧百
神矣氣和則感生萬物矣政成則乂文之經矣財節則

豐武之德矣故天將儲其禎地將阜其用人將盈其力
聖皇之道乾乾翼翼觀藝而無窮詠功而無極

皇帝馬上射贊

第一

甘泉頓射飛野雞一隻走狐二走兔十四不隔箭連中
五隻

一面昭仁三驅示武走則發射伏則不取

第二

中鷹前兔

寒兔滅沒疾鷹逞巧鳴鏑洞飛失雋亡狡

第三

福陽頓同日中狗前兔

狡兔雋犬力奔勢迫持圓駮飛捨拔先獲

望賢頓停日射高飛鴈一隻走麋二走兔三十六不隔

箭連中五隻

獸殪山豪烏落雲雋貫三疊兩血不濺刃

望賢頓中獾狐

夜鳴之鳥是謂獾狐除人之惡應箭而鋪

望賢頓隔馬射中麋

趯趯牙麋寒草同色隔馬百步一縱而側

第四

仙游頓中麋一走狐三走兔十八不隔箭連中八隻

天子省斂薄狩岐陽躬射五十以奉烝嘗

第五

文山頓射聲不隔箭連中二走狐一走兔二十一隻

我將獻鮮從禽於野一日百中以威天下

武停頓向後射走兔其中射兔十九隻不隔箭連中十
一隻走狐三走麋一

霜兔斗迴雲龍矯過天旋月滿捨矢如破

仙林頓分駿射野狐中

有芄者狐起帝之右分駿遠發應踣于手

鷄子搗鵠不著飛過在後箭射應弦而落

驚鷲上飛鷲集橫搏矯箭爭中紛然旋落

一箭中兩鹿橫貫走五十餘步方倒

雙鹿並出一箭橫連上思陵寢以獻時鮮

是日還宮苑內用大箭射走四十口分賜諸王郡王及
從人等

帝入靈囿數百鹿射其四十頒諸羣后

孔子堂杜預贊

猗歟杜侯發揮孔聖春秋既立王道以正列國行事君

子莫之他人有心予忖度之推凡是例定罪原詞開我
後學從祀先師

金紫光祿大夫太常卿上柱國中山郡公崔日
知寫真圖贊

廓哉中山霸宇廟徹逸韻豪爽達音妙絕孝盡思成忠
全見節優游宮侶蕭條禪悅白髮傳貌青松拂雪要之
歲寒是望邦傑

慮舍卹像贊

并序

詩云哀哀父母生我劬勞欲報之德昊天罔極是傷不
可止也戀而懷無所及之感其有飾聖以資親修法以
展慕豈非孝子持明之心哉武擔山靜亂寺盧舍那丈
六鐵像者沙門履徹為先妣用無價黃金之裝也徹師
俗姓劉氏青城真人知古之弟道門釋種守律護戒了
如來廣大之心達如來加持之力見虛空界劃繖茶壇
知定慧手結金剛印過去不悟因後行而追福當來未
聞指前緣而證道觀佛相者成一切智承佛光者壞無

始業張說聞其事而憚之乃合掌西南遙禮偈曰

大雄盧舍那妙法甚深秘神變加持力普昇不動位孝
哉彼沙門愛母而錫類法財裝妙色空色不相異慧日
破金山慈光觸寶地善來金剛手一一見佛事

般若心經序

萬行起心心人之主三乘歸一一法之宗知心無所得是
真得見一無不通是玄通如來說五蘊皆空人本空也
如來說諸法空相法亦空也知法照空見空舍法二者

知見復非空耶是故定與慧俱空中法立入此門者為
明門行此路者為超路非夫行深波若者其孰能證於
此乎秘書少監駙馬都尉榮陽鄭萬鈞深藝之士也學
有傳癖書成草聖迺揮洒手翰鐫刻心經樹聖善之寶
坊啟未來之華葉佛以無依相而設法本不生我以無
得心而傳令則無滅道濟文字意齊天壤國老張說聞
而嘉焉讚揚佛事題之樂石

藍田法池寺二法堂贊

并序

法池西三歸院二法堂茲寺長老初上禪師所造也禪
師本姓彭名至知至性篤孝執親之喪七日不食微言
密行志道探玄究易老莊太一之旨善正書與鍾王同
格其精至點畫宛秀毫縷必見如折槁荷磨文石筋理
灑颯固非人力所致也中朝名士山藪高尚法流開勝
遠近慕焉及晚年專意於禪誦平生藝業脫若遺塵矣
常歎曰帝王父母許我出家雨露生成恩猶一揆依如
來教創是功德萬一乎獻福二宮潛祐七祖將與一切

咸登道場於是三歸堂以長安元年辛丑子月望日癸未立善法堂以開元元年癸丑丑月望日戊辰建禪師母弟仁琬弟子沙門啟疑及沙彌令哲左右斯業實有力焉

三歸堂贊

敬告諸佛子一心清淨觀欲求正直道當從信根入是佛虛空相是法微妙光定慧不相離是僧和合義人空法亦空二空亦復空住心三寶空是名三歸處

善法堂贊

至哉初上人建立善法堂彩翠三世佛莊嚴清淨眼能
運無礙心普入於一切見若不染色知若不取色是名
真實見亦名解脫知佛觀離生滅諸法等如是

益州太清觀精思院天尊贊

并序

蜀山劉尊師上清品人也兄學儒弟奉佛迺畫三聖同
在此堂煥乎有意哉達觀之一致也張說聞其風而樂
之作天尊贊

正氣生神結氣為實上清尊帝中黃首出華彩衣裳虛
無宮室紫氣乘斗赤鑪欽日十天從化萬靈受律蓮花
釋門麟角儒術法其不二心同得一道心惟微守而勿
失

并州勅造座右銘

安萬國禮百神放鄭聲遠佞人

進筆硯架銘

筆硯之間聖心必察青蠅導赦震言漏洩

煖硯銘

筆鋒曉凍墨池夜結香炭潛然推寒致熱

素盤盂銘

并序

國子祭酒韋公好遊山水器珍雅素因適湯泉見梗梓
枌榆良材滿谷乃命山工作為盤盂盥罍樽觶呈其文
理素而不飾還都分遺好事者說受賴盤盂二事以銘
之云爾

幽山之水無心世路器為盤盂制以法度匪丹匪漆惟

真惟素理真防毀節全思固多用必傷處盈招惡嗟嗟
君子鑒微在悟實是天然貽我朋故

溫泉箴

東山少連曰玄冥氏之子曰壬夫安祝融氏之女曰丁
芊俱學水仙是為溫泉之神焉帝命之救萬靈盪滯結
腑臟達膚腠泄下人多賴之上帝是崇乃飛廉氏之佚
女妒之常欲大恩其功故入溫泉必齋以洒心戒以防
患恕以利物含生之疾我願除妖二神嘉之吹湯激邪

珠連漚累滴汨揚華此其效也若入溫泉僻心穢行惡
言淫形居食失節動出躁輕二神醜之不匡人命飛廉
佚女以裾蔽人是生疰芒風瘍眩齟之病夫有意之醫
照合神理無恒之醫身為慾使莫之益傷之者至矣是
以君子慎其微也

贈別楊盈川炯箴

杳杳深谷森森喬木天與之才或鮮其祿君服六藝道
德為尊君居百里風化之源才勿驕恠政勿煩苛明神

是福而小人無冤畏其不畏存其不存作誥茲酒成敗之根勒銘其口禍福之門雖有韶夏勿棄擊轅豈無車馬敢贈一言

獄箴

官有決曹掌茲法獄匪惟議罪亦以防欲所貴仁恕非矜窘東吏苟吹毛人安措足古之為主是戒是勗茫茫率土蠢蠢羣生賢愚中雜真偽相傾若魚之駭如鳥之驚不能無犯宜持以平或大或小時重時輕無以快志

期乎得情孰曰非重國之政令孰曰非輕人之性命虐
則招咎寬則納慶宜慎宜恤可畏可敬為獄則固為牢
則幽晨嚴管鑰夜密更籌寂寂圓土累累繫囚求食搖
尾見吏垂頭自昔立名此為非所逼隘狹室敲傾漏宇
冬有祈寒夏多隆暑馬可失入焉可妄處勿謂無妨勿
謂無傷匹婦含怨三年亢陽匹夫結憤六月飛霜可以
安危可以興亡敢告司憲無輕國章

東山記


兵部尚書同中書門下三品修文館大學士韋公體舍
真靜思協幽曠雖翊亮廊廟而緬懷林藪東山之曲有
別業焉嵐氣入野榛烟出俗石潭竹岸松齋藥畹虹泉
電射雲木虛吟惚恍疑夢間闕忘術茲所謂丘壑夔龍
衣冠巢許幸溫泉之歲也皇上聞而賞之迺命掌舍設
帟金吾劃次太官載酒奉常抱樂停輿輦於青靄佇輦
綸於紫雲百神朝于谷口千官飲乎池上緹騎環山朱
旆焜野縱觀空巷途歌傳壑是日即席拜公逍遙公名

其居曰清虛原幽棲谷景移樂極天子賦詩王后帝女
宮嬪邦媛歌焉和焉以寵德也加以中宮敦序謂我諸
兄引內子於重幄見兒童於行殿家人之禮優棠棣之
詩作於是實其筐筥下以昭忠信之獻貢其束帛上以
示慈惠之恩朝野歡并君臣義洽夫飛翠華蒞茨道至
道之主也紆紫綬期赤松素履之輔也千載一時難乎
此遇故兩曜合舍衆星聚德雅道光華高風允塞寒谷
煦景窮崖潤色猗歟盛事振古未有篆之立石貽代厥

欽定四庫全書

後

卷十二



張燕公集卷十二

欽定四庫全書

集部

張燕公集卷十三至
七

詳校官侍郎臣謝墉

檢討臣何思鈞覆勘

總校官編修臣王燕緒

校對官主事臣陳墉

謄錄監生臣吳貽棟

欽定四庫全書

張燕公集卷十三

唐 張說 撰

表

請封太山表并批答

臣說等言臣聞聖人者與天地合德故珍符休命不可得而辭鴻名盛典不可得而讓陛下功格上天澤流厚載三五之盛莫能比崇登封告成理協幽贊故符瑞必

臻天意也書軌大同人事也菽粟屢登和平也刑罰不用至理也今陛下稽天意以固辭違人事以久讓是和平而不崇昭報至理而闕薦祖宗億兆之情猶知不可況上帝臨照祖宗顧諟其可止乎願納王公卿士列岳搢紳之衆望迺命有司速定大典臣不勝懇禱敢昧死再拜

朕以眇身欽承丕業十餘載矣夙夜兢惕常以至道未暢元元未安上累先聖之心下受萬方之責何敢議封

禪躡岱宗乎今羣官所奏靈符歲稔戎狄向風蓋上天
降休宗廟垂福豈朕薄德冒以當仁然天休不敢不答
廟祐不敢不報王公衆望不可固違將以蒙福謝誠非
以成功類帝輒用忘忌祇遂羣心

請八月五日為千秋節表并勅旨

左丞相臣說右丞相臣璟等言臣聞聖人出則日月記
其初王澤深則風俗傳其後故少昊著流虹之感商湯
本玄鳥之命孟夏有佛生之供仲春脩道祖之錄追始

尋源其義一也伏惟開元神武皇帝陛下二氣含神九
龍浴聖清明總於玉靈爽朗冠於金天月惟仲秋日在
端五恒星不見之夜祥光照室之朝羣臣相賀誕聖之
辰也焉可不以為嘉節乎比夫曲水禊亭重陽射圃五
日綵筵七夕粉筵豈同年而語也臣不勝大願以八月
五日為千秋節著之甲令布於四方羣臣以是日獻甘
露醇酎上萬歲壽酒王公戚里進金鏡綬帶士庶以結
絲承露囊更相遺問村社作壽酒宴樂名賽白帝報田

神上明玄天光啟大聖下彰皇化垂裕無窮異域占風
同見美俗

勅旨凡是節日或以天氣推移或因人事表記八月五
日是朕生辰感先聖之慶靈荷皇天之眷命卿等請為
令節上獻嘉名勝地良遊清秋高興百穀豐熟萬寶已
成自我作古舉無越禮朝野同歡足為美事依卿來請
宜付所司

請置屯田表

臣說言臣聞求人安者莫過於足食求國富者莫先於
疾耕臣再任河北備知川澤竊見漳水可以灌巨野淇
水可以溉湯陰若開屯田不減萬頃化崔葦為秔稻變
斥鹵為膏腴用力非多為利甚博諺云歲在申酉乞漿
得酒來歲甫爾春事方興願陛下不失天時急趨地利
上可以豐國下可以廩邊河漕通流易於轉運此百代
之利也當今國儲未贍邊軍未息勸人農業願留聖意
亦嘗賜前堦之食承後騎之顧竟唯唯而無一言者豈

敢隱情於聖主也正以職在伏衛憂於部伍馬上非公
議之所囿遊非朝廷之事今昧死上愚見乞大臣籌謀
速下河北支度及溝渠使檢料施功不後農節謹附賀
正使隨軍前曹州考城縣尉同希再奉表以聞謹言

禮儀使賀五陵祥瑞表并答制

右臣等伏以陛下孝通天地親朝五陵拜橋陵則紫氣
見獲白兔甘露降白鵠天光清和日色明朗拜定陵則
有景雲見甘露降拜獻陵則甘露被樹祥雲抱日拜昭

陵則先聖見神遊薦享之際陛下親聞刻怠初進服用
樂器自然發聲又素像回面甘露降滋從祀先臣歷聞
蹈舞拜乾陵則有靈草生甘露降日抱戴之瑞此皆陛
下虔誠上感神靈福降四海同懽萬方忭躍臣等幸
陪大禮親覩禎祥無任大慶之至謹奉表陳賀以聞臣
說謹言

朝拜園陵罄申精到深懼虛昧未感靈心今嘉瑞來臻
神無譴怒欽承祥祉慶競兼懷儒林史官當貢朝典

集賢院賀太陽不虧表并答制

太史奏太陽不虧聖德上感變災為瑞陽光增輝陰慝
不作休徵之美莫盛於斯臣等無任欣忭之至謹進狀
陳賀以聞謹進

彼日而蝕詩人所醜應虧不變轉異為臧未知天意降
休將或疇人未洽媿無一言之善而同三舍之慶循省
來章用增勵惕

賀大衍歷表

臣說白伏以開元大衍歷天旨裁其紀綱日官考其精
要履端更始敬授維新加以辨五行之序推七精之數
明徵聖期實光上德臣又見梁天監中陶弘景著玉璽
記云盛德木子以肇來運頃者僧一行璿衡歷得皇家
天命成數千年古今祥兆若合符契歷數既在於聖躬
卜年又表於長歷莫大之慶獨冠前王臣忝跡儒林預
聞昌運無任忭躍之至謹奉表陳賀以聞

賀示歷書表

玄宗

臣某等言內侍尹鳳祥至奉宣聖旨內出新撰厯書二
十五卷以示臣等竊窺深奧仰觀英華涉海登山罔知
攸際臣聞唐堯光宅順昊天而定四時虞舜登庸在璿
衡而齊七政伏惟開元聖神皇帝陛下至德廣運文明
睿哲道冠生知與神合契備往聖之能事紹昔王之闕
典發揮易象以應乘乾之時考正厯書更表履端之始
上包二帝下括三王徵晷運之盈虛究推步之疎密備
稽氣象載纏坎離

一作載
覆纏離

三辰順軌而更明五緯合度

而增煥是使天地貞觀神人允諧唐虞舊章於斯重覩
臣等幸陪書府得預朝門抃躍之情實萬恒品奉表陳
賀以聞

賀祈雨感應表

玄宗

臣某言臣聞水旱常數堯湯固有聖賢之理恭潔為難
自冬踰春積陽成亢陛下以時災繫政人患由君退巫
女之雩却應龍之請陛下躬自暴露炎景瞻仰雲漢推
心引譴為人受咎誠既發而動天言尅期而降雨今已

霖霖三日澤漏重泉草樹含欣郊原變色加以雲平雨
細氣潤風和豈惟優渥王畿必將周遍天下羣心舒釋
聖情開暢無任萬姓歡說之至謹奉表陳賀以聞

讓兵部尚書平章事表

臣說言伏奉九月十九日制書到并州授臣兵部尚書

同中書門下三品王人在門驛騎臨

集作首

路奉恩循分

以慙以惕臣說

中謝

臣早以書生射策載筆聖朝晚以

軍誌典兵秉

集作擁

旄乘塞祿非授進

集作授等

寵是宸衷久

侍玉璫四掌綸誥一心好直三黜其宜今復用之猶夫
人也何足以舉明邦政光緝帝猷更策疲驂來乘法駕
又臣已受命司籍專意簡書所希散冗因間就業忽叨
劇職責大憂深人心有限事難兩濟國史無成臣執其
罪上思薦賢以自代下願守分以全節竊見開府宋璟
清介獨立倚法不回詹事陸象先清明向道臨事能斷
其高明有素歷朝之所伏委其積行無疵衆人之所體
信揆停往任未盡宿誠乞迴此恩以納來效必能補舊

政之缺漏廣前途之軌轍雖深心用力臣頗與二子齊
驅然按德考年彼皆有一日之長天下者累聖之公器
宰相者萬方之具瞻臣所以廷讓彰言不陳密啟伏願
聖恩聽輿論二字論表集本並作與而舉俾諧僉矚儻期任得人
實海內幸甚無任力微任重惶懼之至謹奉表陳讓

讓封燕國公表

臣某言伏奉今月七日制書封臣燕國公食封三百戶
寵靈猥及中心如慙臣某謝中聞至道之時重法守義

上無無功之賞下無無德之祿故授受禮全而踰越不起伏惟陛下光撫寓內大寧天域百度惟新萬靈翹注

建侯疏壤允荅元功臣亦何人首膺是命

一作首
黷嘉命

自古

有傳道而爵說經而封蓋以訓蒙成聖資師通學臣之侍講有異前聞何者大明朝昇螢爝無助時雨夕濡浸灌馬施幸得依附光景游泳渥澤豈敢虛承啟發之恩謬荷將就之報且如人臣之義二則為罪一心不回愚智之分譬如犬馬有不背之性草木有不凋之理知何

德於天壤而欲蒙造化之偏施哉臣之無功正與此類
叨恩過量終懼且慙乞迴聖慈以容介節無任惶悚之
至謹詣朝堂奉表陳讓以聞

讓中書侍郎表

臣說言伏奉制書除臣中書侍郎寵命俯臨驚魂自失

臣說

中謝

臣聞雲構鬱起非

類表作豈

枳棘之任天波暴集寧

溝澮所容臣識無通方文不經國南宮華省已忝前行

西垣內閣

集作閣

將陪近侍心慙官謗跡愧時流何以承

掌王言贊決機務當今二儀再造百度皆新太平之基

惟賢是與混成庶政責在中書豈以長才敢膺首

類表作榮

選乞寢恩命改擇時髦惟慎庶官以諧僉議無任惓款
之至謹詣朝堂奉表陳讓以聞臣所讓人別狀封進

讓右丞相表二首

臣說言伏奉制書除臣右丞相兼中書令臣學慙稽古
早侍春官階緣舊恩忝竊樞近雖思致君堯舜而才謝
伊臯今屬升中大封方求俊乂猥

集作俾

升端右實媿朝

行乞停新恩獲守舊職辭訥情懇希垂察諒無任屏營
之至謹奉表陳讓以聞

二

臣說言伏奉今月十日制書除臣尚書右丞相思命自
天戰跼無地臣說

中謝

臣少長儒門壑鑿墳史才非高格

官不因人徒以命偶龍興位階鴻漸五入西掖七踐南
宮中間拙延謫故直招玷缺傷矢之禽聞弦虛墜賜環
之客聽歌先泣此則魂

一作魄

為危感氣由懼奪安可重

收廢器再辱端揆何以師長禮闈正持憲府當今典章
草故風教鼎新野無四隱朝有三傑具瞻之地願擇時
髦臣幸沐遺簪墮履之恩好生養志之德朝遊簡牘暮
對圖書受賜無涯循榮過分豈更干處士之橫議招徇
奴之遙哂艾英華作文非骨自瘡負乘致寇雖則愚情懷戀
覲冒求寵亦望聖慈限約令集作生非度餘年願停今授長
守舊史罄陳肝胆非敢飾讓謹詣朝堂奉表自乞臣說
誠惶誠恐頓首頓首死罪死罪謹言

讓中書令表

臣說言伏奉今月十一日制授臣中書令恩渥自天震

越無地臣某

中謝

伏惟陛下至孝安親大功定國六合翹

首庶政惟新雍熙之化望在茲日中書理本臣叨首名

將何以翊贊聖君光澤天下自臣攝官禁掖已涉七旬

不知賢才以舉是不仁也不辯不肖以退是無勇也何

足以備乎宰臣胡顏冒恩復受真拜臣之愚執正在於

此不敢繁詞以塵聖聽乞迴綈授改擇時髦無任懇款

之至謹詣朝堂奉表陳讓以聞臣所讓人別狀封進

讓平章事表

臣說言臣伏奉宣旨制書以臣同中書門下平章事承命戰汗拜舞失容臣說誠惶誠恐頓首頓首死罪死罪臣本書生器識凡近仕不望於通貴祿只宜於代耕蒙時寵榮越踐臺閣局心守職竊所庶幾長筭經邦則無逮及伏以廟堂寄切軍國務殷循涯審分非臣攸處為國者為官擇人為臣者陳力就列若志小謀大力微任

重豈攸顧惜賤軀實恐上塵王政是以披露肝胆不暇
飾詞乞停此授俯遂誠情無任怖懼慙惶之至謹詣朝

堂奉表陳讓

集作請

以聞臣某云云

讓起復除黃門侍郎表

草土臣說言臣私門凶咎喪紀未終不自毀滅苟存聖
代忽降制書復臣工部侍郎尋奉後命授臣黃門侍郎

震駭

集作驚

失圖哀怖殞絕臣說誠惶誠恐頓首頓首死

罪死罪臣弱年早孤母氏訓立得紹基構忝列簪裾從

官歷年晨昏多闕播遷遠裔離別又苦顧復無答報養何追心所摧感語不能喻甫至冬中禮及祥禫今已春暮瞻言幾何是臣事朝廷日長戀几筵日短乞寢嚴命許達私情訴衷祈天所望矜遂無任荒迫之至謹詣朝堂路左奉表乞哀以聞謹言

第二表

草土臣說言臣在疚承縈布哀陳歎精誠無感天睠未迴假喘殘生悲懼轉集臣說誠惶誠恐頓首頓首死罪

死罪臣聞苦者不覺聲哀窮者貴其言達情有至切辭
無敢隱臣為少子慈愛所鍾每一離別輒加憂悶況臣
生年多故違隔私庭終堂之日身限公事存既數違左
右沒復不畢几筵痛心自傷特殊人類臣今望延數月
企及再期乞恩無多報國非晚冒死重請冀蒙哀遂無
任懇迫之至謹詣朝堂路左奉表陳乞以聞

第三表

草土臣說言臣荒喘窮情再黷旒宸

一作宸聰

懇誠不到未

感天心誓將冒死祈恩分外

中謝

臣本書生門非代祿數

葉單緒族無親房臣父遭憂曾祖未葬臣有兩兄一妹

甥姪九人又有中表相依尚成百口吉函衣食待臣以

辦臣今拜職

一作職忝

黃閣侍奉丹墀厚祿清班一朝改官

舉宗榮賴為幸過甚人情所欲豈合稽恩正以訖訖苦

心有所未盡臣亡母在日朝夕誠臣以獨立無徒好直

多忤知子者毋果驗所

一作此

言往罹大獄竄命炎海晨

出晚歸貽慮非一况涉危難傷心幾途追計生平倍增

摧慕侍養日少違離日多即

一作則

臣母憂臣以終身臣

其忍服縗以從事情既不同常例望在特降殊恩

一作私

臣先患風緩近加虛痺陛下倘從臣數月容過再替非但寬其哀疚固亦全其生理亡身報國庶竭後圖木植

一作直

有性枉之則折人願在心違之則苦雖強

一作欲

為

用將何以堪銜泣仰天冀蒙哀允無任懇迫之至謹詣

朝堂路左奉表陳乞以聞

謝觀唐昌公主花燭表

玄宗

臣說言內侍尹鳳祥宣勅賜臣觀唐昌公主花燭伏以

天人下嫁王宰送行苟非榮

集作殊

寵何階瞻望臣免歸

餘叟忽承朝請之恩廢駕羸

集作疲

駸復覩肅雍之化鴻

私所被枯瘁生光無任歡荷之至謹奉表陳謝以聞

張燕公集卷十三

欽定四庫全書

張燕公集卷十四

唐 張說 撰

表

諫內宴至夜表

臣聞上天示下災祥將以誘導人主先王仰觀休咎亦以順脩政教易曰天垂象聖人則之言天人之際感通必矣臣伏見去年十月十七日月滿猶望應虧不虧今

月十七日亦未少虧

集作月亦未虧

此易常之異也夫月者至

陰之氣臣下之象當助天作明順期

一作時

盈缺若

一作今

過盛逾時盈縮乖度得非臣下之咎而上天之誠耶

一作

也伏願陛下深察熟思而預防臣又見近日內宴夜深

方罷小臣無識抑所未安王在在鎬

一作周王在鎬

凱一作愷樂

飲酒此誠大樂

一作雅

之美也臣卜其晝未卜其夜此蓋

春秋之義也伏願陛下宴樂之餘

一作終

不及於夜臣職

忝補闕昧死陳愚謹言

進鬥羊表

玄宗

臣某言臣聞勇士冠鷄武夫戴鶡推情舉類獲此鬥羊
遠生越雋蓄情剛決敵不避強戰不顧死雖為微物志
不可挫伏惟陛下選良家于六郡求猛士於四方烏無
遁材獸不藏技如蒙效竒靈圓角力天場却鼓怒以作
氣前躑躑以奮擊跌古穴切疾也若奔雲之交觸碎如轉石
之相叩裂骨賭勝濺血爭雄敢毅見而衝冠驚很聞而
擊節冀將少助明主市駿骨揖怒蛙之意也若使羊能

言必將曰若門不解立有死者所賴至仁無殘量力取
勸焉臣緣損足未堪履地謹遣男駙馬都尉埒謹詣金
闕

舊唐書
作明

門陳進輕冒宸嚴伏深戰越

進佛像表

臣某言去年行塞至朔州忍辱尼寺見有高祖太宗造

金像銀趺刻題尊號

集作
碑

彼州士女屢覩佛光臣懇思

聖心如在咫尺伏以皇帝事業遠存荒塞拯溺救焚身
勤慮苦歸誠佛寶何神不據信知功遍區域澤周生人

心憑神

集作聖

靈躬履危險故皇天眷命奄有邦家後嗣

聖人欽承大寶當思積德而興帝國系本艱難而成事

業

二句集所當思由積德而興帝系本艱難而成王業

先聖一心奉佛者蓋為百

姓求福也陛下為繼文之主實創業之功再廓氛祲重

安廟社垂統萬億同符祖宗夫惟興王必藉佐命咸有

一德克享天心書曰非天私我有商惟天佑於一德非

商求於下民惟民歸於一德功臣同德可不念哉物有

小而感深事有微而效

集作傳

遠臣謹將金像隨表奉進

謹言

進渾儀表

臣某言臣聞迎日授時莫先於厯象先天成務必歸於制作伏惟開元神武皇帝陛下建中立極緯武經文至德難名神功不測於是定厯成歲立象考天紹唐堯欽

若之尊

集作典一作文

繼虞舜在璿之義上皇能事於斯備矣

臣書院先奉勅造游儀以測七曜盈縮去年六月造畢

進奏又承

集作奉

恩旨更立渾儀臣等準勅令左衛率府

長史梁令瓚檢校創造於是博考傳記舊有張衡陸續

王蕃錢樂之等並造斯器雖渾體有象而不能運行事

非經久旋即

一作亦

毀廢臣今按據典故鑄銅為儀圓以

像天使得俯察上具列宿赤道周天度數注水激輪令

其自轉

集作運

一日一夜天轉一周又別立二周於絡在

天外綴以日月令得運行每天轉一匝日行一度月行

十三度十九分度之七凡二十九轉有餘而日月會三

百六十五轉而行匝仍置水

一作冰

櫃以為地平令儀半

在地上半在地下晦明朔望不差毫髮又立二木人於地平之上前置鐘鼓以候辰刻每一刻則自然擊鼓每一辰則自然撞鐘皆於櫃中各施輪軸鈎鍵相錯開鎖相持轉運雖同而遲速各異周而復始循環不息陰陽

不能逃其數分至

集作度分

不能隱其時究天地之回斡

集作

斡運極乾坤之變化斯皆上稟聖謨

集作摸

旁獲神助臣等

愚思非所能及錄付史館宣示百寮使知告成之功迺越前古無任勤懇之極謹隨表奉進以聞臣某誠惶誠

懼

幽州論戎事表

臣某言伏以先帝以臣踐履忠孝使臣啟發聖明故得侍讀春闈夙承天眷洎於中歲兼掌樞密內當沸騰之口外禦傾奪之勢陛下監撫既安自天所佑然臣叶贊之意明神啟之開元之始首典鈞軸智小任大福過災生出守三州遠離六載曲直非已升降由人惟君知臣事不待說今既牧邊鎮委重戎麾竊以兩蕃共和能識

同異九姓遠聞撫納欲恃賊帥無侵擾之慮保兩蕃受
徵發之期臣愚料之恐未然矣何者賊帥親一作新立必

逞兵所加必收九姓若去兩蕃搖失九姓雖屬并州節
度然其出州密邇脫有風塵何所不至臣熟聞幽州兵
馬寡弱卒欲排比未可即用城中倉糧全無貯積事未
逼迫臣實憂之伏乞聖慈深以垂意博詢舊將預為籌
畫事若早圖必無後悔且孤臣總衆易起猜嫌寬大失
濟事之宜嚴整招怨黷之謗遠辭天聽臨事回惶如有

論告臣身奏劾軍事者乞追臣面問對定寘辭則日月
無可蔽之期幽遠有自通之望伏乞留書在內時加矜
察

并州論邊事表

玄宗

臣某言臣說頓首死罪死罪言臣聞小忿延起大患小
罪不寬迫成大禍契丹奚背恩誠負天地不容之責然
原其狀本是夷狄君臣不和自相誅戮耳伏集作望聖
慈且使其族類在朝者將勅書再三告讓因其所欲立

酋長而便定之或可不戰而定也必告之不訓則大發

兵馬東召犍羯西舉九姓來春未青數道齊入窺于之

首可拾而取未為晚也天恩若不忍以中國勞事蠻夷

則嚴兵備塞棄兩蕃如糞土耳又許欽淡集作洪擁二萬

餘兵集作衆據五缺之城有糧即守不可拔無糧即鼓而

行何所慮也今遣史獻非時遠抄兵回甚難八字作非時遠抄近

掠其實甚難萬一未捷賊氣轉壯臣愚不曉集作下臣愚昧不敢隱

情伏望聖恩再加裁度臣說誠惶誠恐頓首頓首

百官請不從靈駕表

臣某等言伏以靈駕首途聖思攀從國計非便羣情不安冒昧上祈未蒙哀允跪拜還旨載深惶惕臣某等誠惶誠恐頓首頓首死罪臣聞古者天子上法天心下極私情不違衆欲以順人理國為孝以克己制心為禮是故凡聖異禮公私殊制私心獨展凡人之孝萬姓感善聖人之孝也陛下行堯舜之事以萬姓為心奈何守魯閔之節懷獨展之願臣等竄竊所未曉且永淳以後

關輔流散近適旋定人猶未足今山陵起築役徒總萃
彌春涉夏為費弘多若陛下此行羣司畢從於人取給
臣實難之水旱小愆農慮非淺東都則水漕淮海易資
鹽穀之蕃陸走幽并近壓戎夷之便朝命新復人望在
安宜應靜鎮未可移動陛下若俯順羣願留撫都人則
其安若此如不勝私情攀奉靈駕則其慮如彼况扈從
兵馬既不預集行宮廩蓄又未先備發期甫爾支計闕
然倉卒敦迫必不堪辦若待陵寢既安霜露終感三農

歲稔萬乘時巡奉園廟以展虔瞻日月以何遠今固將
抒私戀棄羣言忘人力普國用此實非陛下安集新業
之圖亦恐非先后憐憫遺人之意且朝廷故事典章猶
在獻陵追遠太宗不至於三原昭陵上遷高宗不至於
九峻宣先帝私懷不甚故羣臣公議之所奪也伏願仰
遵舊訓顧定新基屈至性而順羣心抑小節而成大孝
使軍國長算咸洛皆安邦甸窮人賦斂少減萬姓翹望
實深至願百寮結誠期於死請無任悲迫之至謹詣朝

堂奉表固請以聞

為留守奏慶山醴泉

臣聞至德洞微天鑒不遠休徵祕景時和則見是知綿
代曠厯慶諜祥經帝王有必感之符神靈無虛應之瑞
伏惟天冊金輪聖神皇帝陛下金鏡御天璿衡考政欽
若元象弘濟蒼氓茂功將大造混成純化與陽和俱扇
朝百神之樂職宅萬國之歡心嘉氣內充淫雨外息豈
止搖風紀月之草列蒔於階厨儀蕭銜籙之禽相鳴於

戶閣而已固有發楨厚載抽貺泉源表玄德之潛通顯
黃祇之昭報臣於六月二十日得所部萬年縣令鄭固
忠狀稱云六月十四日縣界霸陵鄉有慶山見醴泉出
謹差戶曹參軍孫履直對山中百姓檢問得狀其山平
地湧拔周回數里列置三峯齊高百仞山見之日天晴
無雲異風雲之遷徙非崖岸之騫震剡爾隆崇巍然翦
鬱阡陌如舊草樹不移驗蓋地之祥圖知太乙之靈化
山南又有醴泉三道注三池分流接潤連山對浦各深

丈餘廣數百步味色甘潔特異常泉比仙漿於軒后均
愈疾於漢代臣謹按孫氏瑞應圖曰慶山者德茂則生
臣又按白虎通曰醴泉者義泉也可以養老嘗出於京
師禮斗威儀曰人君乘土而王其政太平則醴泉湧潛
巴曰君臣和德道度協中則醴泉出臣竊以五行推之
六月土王神在未母之象也土為宮君之義也水為智
土為仁伏於土臣之道也水相於金子之佐也今土以
月王而高水從土制而靜天意若曰母王君尊良臣善

相仁化致理德茂時平之應也臣又以山為國鎮水實
利人縣有萬年之名山得三仙之類此蓋金輿景福寶
祚昌圖邦固不移之基君永無疆之壽自永昌之後迄
於茲辰地寶屢昇神仙再聳未若連巖結慶並泌疏甘
羣瑞同區二美齊舉高視古今曾無擬議信可以紀元
立號薦廟登郊彰賁德齡愉衍萬宇臣辱司京尹忝寄
留臺牧西夏之疲人荷東蕃之餘寵游泳鴻沛神禧嘉
祉物感有歸先啟茲部喜覩殊觀實百恒流踴躍一隅

馳誠雙闕伏請宣付史館頒示朝廷無任鳬藻之至

為留守作瑞禾杏表

臣聞天徵地杳惟聖能通物寶霸喜在德斯感伏惟天
策金輪聖神皇帝陛下覆翼萬方植生羣類化行至道
風流太和白耀青光日日月之瑞赤文玄甲手河洛之
符既慶溢於山泉又嘉賁於草木臣今月三日得所部
萬年縣令鄭固忠狀言縣界內霸陵鄉新出慶山南之
醴泉北岸有瑞杏三樹再葉重花嘉禾三本同莖合穗

臣謹差司兵叅軍鄭味玄檢覆皆實臣謹按孫柔之瑞
應圖曰嘉禾者五穀之長也王者德茂則生昔炎帝教
治人心而嘉禾秀周公理合天道而嘉禾豐臣又以事
可理推物有類驗蜀桑異葉李定知其有祥漢木奇枝
終軍以為無外今植物搖落而瑞杏繁滋所謂仁育之
風行於肅殺之序此蓋聖道隆渥靈祚弘多朱萼素花
彰孝理於詩傳一莖九穎合德耀於祥經曠代殊珍崇
朝累集方俟山流石髓杏茂仙林醴挹軒漿禾登堯膳

受天介福錫帝長齡覲王母於崑臺朝神人於谷口今
綠苗尚莠黃粒未成當須晚秋不獲早獻臣忝尹茲部
頻囑洪休抃躍之誠倍萬常品

為留守作賀嶠山

臣聞山川變見如來有得道之祥國士遠移至人任不
思之力伏惟皇帝陛下弘惠福深勤人願滿蓮花授記
應上聖之降生貝葉開圖握大雄之寶命司戶叅軍孫
履直伏承臣奏所部萬年縣新出慶山醴泉乃有天竺

真僧於春首獻狀若以梵音所記此是祇闍山恒河沙
法佛必經林下虛空衆聖堂處巖間隱見外方湧秀中
土岑泉可識體類宛然感應十號之尊示見千輪之主
此實天威無礙地寶有歸化焜耀於栽成理竅冥於言
說但瞻三山丹壁庵靈鷲而飛來三泉淥池逐神龍而
吐沃峯高八百協周室之隆基地得萬年祁皇靈之資
始儒書分載望偈希聞加以堅固開林吉祥被草重花
瑞杏藻岫紅源九穎嘉禾慈巒岱壑原臨白鹿識鹿苑

之仙遊路邇朱城悟王城之鍾聽方俟迴輿雪嶺厭香
積於羣臣沉璧天池蔭靈枝於下國吹法螺而朝玉帛
乘瑞象而會天人溢宇流觀殊隣決慶臣守符京郡奉
神徽於郊畿係葉皇柯仰慈雲於雨露喜抃之極倍百
恒誠

為留守奏羊乳麋表

臣聞應感無方每先時以見象神鑑不昧必憑物以示
人有德著而休歸或祥來而事應伏惟皇帝陛下端冕

馭天舞干柔遠南越瑞貢久通澤而歸仁西域奇山近
隨方而應聖臣今日得所部萬年縣令鄭固忠狀送新
出慶山下殺牝羊乳麀麀一頭狎擾因依動息隨戀如
從所產若素同羣理有可嘉事無前例竊以異類相育
外方慕化之徵野畜自馴荒服來王之兆必有遠夷解
辮歡心百獸之庭獷俗懷音稽顙三乘之會臣言可驗
翹足是期昔馬或生羊易占得人安之體犬時養彘天
鏡顯代康之文援此比蹤實為同貫況復晨飲醴泉夕

下竊山翳仙杏之奇花拾嘉禾之餘穗羊祜甚玉麀慶
如銀晦朔未移祥符累集福應之盛前古未聞臣忝尹
京都屢薦嘉瑞忭躍之至兼倍恒流謹差某官奉表隨
進

為留守奏嘉禾

臣某言臣聞天聽自人神和在德代非乏瑞罕遇交泰
之期福不虛徵必自休明之主伏惟皇帝陛下仁覆萬
靈孝理四海功罔高於尊祖道莫大於配天嚴備郊裡

崇肅宗祀秩百王之禮兼六代之樂化溢膠庠訓優更
老政每光於帝籍役不奪於農時嘉氣橫浮祥風紛洒
騰文煒色九光連合於貞明逸輦殊輪百寶駢滋於動
植臣今日奉進止告望鳳臺山泉之瑞其日於東山
栢城內得嘉禾一本臣初見衆苗亘隴香穎垂秋嘉翫
簌滋欲觀稔粒左右無識折以呈臣異其綠葉緩舒蔥
芒璧秀熟視竒狀乃知嘉祥下則異畝合莖上又同延
雙穗昔雍熙之代理政之君雖導出應時而生不擇地

未有託根神域彰孝德之能深吐秀壽宮助榮盛之豐
潔此蓋睿誠通感天祐降祥中古以來未覩斯美臣籍
慶宗枝久沐星潢之潤躬持瑞穎預奉天保之符忭悅
之誠倍兼恒品

為請邊道大總管建安王奏失利

臣某言今日某往峽石山稱前軍王孝傑等以某日失
利於峽石山忽聞殞絕心摧魄死上孤天威下慙士卒
死罪死罪頓首頓首臣以驚怯謬職戎麾銜戴恩榮統

率將士驅關隴之馬引淮海之餉旗幕亘於邊城弓甲
傾於內府不堪任使撓失節度羣帥無決勝之功偏師
有挫衄之咎長犬羊之孔熾縱梟獍之未滅憤結靈祇
怨毒骨髓臣實其罪罪非他人忍耻苟全遠愧胡顏之
責引慝遄死內負猶鬪之心踧踖無顏進退靡處臣既
不建師律有干常憲合即嚴科以塞重責然以見在兵
馬交要部絕未敢束手軍事委置旌節稽緩刑書伏深
兢戰特乞更召嚴猛代臣統帥請歸罪司寇以正國刑

囚伏邊陲唯待斧鉞

為建安王謝賜衣及藥

臣某言伏奉月日恩賜臣衣及藥渥流璿極彩溢旌門
拜捧戴舞載欣載越臣受律虧方扞城無寄偏師不振
逋寇仍滋進慙計日之剋退任踰時之咎誠合歸罪司
寇以嚴深責豈圖天寵猥臨宸慈寬假當從褫服轉承
且吉之衣宜肆典刑翻加有喜之藥毀車夷馬復振鸞
和窮炭枯莖重敷榮觸影雖邊塞心馳闕城微命易投

生成難謝無任感戴

為建安王讓羽林衛大將軍兼檢校司賓卿

臣某言伏承月日勅書除臣右羽林衛大將軍兼檢校司賓卿朝榮對及恩露洪垂聲仰驚并環揆慙失臣某頓首頓首臣席慶皇枝辱司天衛素官成責久盈人口

頃屬山戎自擅王師震加謬當推轂之禮竟空汗馬之績實賴睿謨幽贊靈兵潛討滅犬羊於遼海卷旌麾於燕薊臣得歸功北闕待罪東藩沐泳休貺生死榮幸安

敢賣要塞而告勞貪天功以為已又况羽林清禁上則
星辰主客命卿下法河海蓋文武具美方議望僉歸豈
臣弊劣所堪尸忝伏乞特迴睠鑒更擇能賢俾朝興薪
樵之歌臣免伐檀之刺非敢飾讓實披誠請無任悚戴
之至謹詣朝堂奉表陳讓以聞

為薛稷讓官表

臣稷言伏奉制書除臣工部尚書寵靈俯逮營魄震飛
揣分何加戴恩無力臣某謝中臣才乏濟川功微橫草

故以業承薪構澤潤葭莩效雕蟲之薄技蒙金螭之榮
飾徒叅進對愧無好詞頃以冗職東垣慙諧清曠今若
統司南省將招素食五翟之正典事斯重六官之長求
人未易以臣叨授實謂非宜願寢前恩致命他士無任
悚懼之至謹詣朝堂奉表陳讓以聞臣所讓人別狀封
進

為郭振讓官

臣某言臣本書生幸事先帝歷踐清職遂叅機密宗武

樹黨忿疾正人猜忌眉睫構結瘡痍臣與一二貞士指
天誓心枝梧羣邪扞城王室曉入宮省暮不望歸艱危
備常幾不免禍日覲一日以逢開泰臣之宿圖今已足
矣陛下寶位既復元良又定凶讎咸剪百度惟新正宜
博採屠釣大變風俗豈臣微才空忝重任外不厭於衆
望內實猥於多言但父年老先嬰風疾五月已來不離
枕席臣方寸已亂短效無施夙夜在公扶持有關乞免
官秩歸侍私庭罄心仰恩期於孝治無任懇迫之至

為僧普潤辭公封

僧普潤言伏奉甲寅制書以普潤加榮沐秩授邑封公
聖恩無涯將變枯朽佛法有教誠願住持普潤自剃落
壞衣五十餘載心不見是口不言俗因誠證業憑禪悟
理幸逢皇祚特起大運有歸皇太子逼畏凶讎永懷興
復憂虞之際始蒙顧問貧道起廣救之悲決必勝之策
奉符命之旨贊無畏之心今得衆生乂安羣魔消伏在
於法侶所願為多視身本無何功受祿天位有德陛下

享之天討有罪太子行之豈貪天之功以為己力責佛之法而求身利必若冒榮背律返俗違真亦恐乖陛下崇信之誠失如來付囑之義凡所稱述諸佛證明伏惟聖慈亦垂開領乞停恩授以幸法門無任護戒傳道之至願